

四庫全書

子部

欽定四庫全書

冊府元龜卷三百五十九

宋 王欽若等 撰

將帥部

立功第十二

唐崔光遠為鳳翔節度使上元元年於普閏縣界破党  
項四千餘衆斬首二千餘級生擒一百餘人收獲駝馬  
牛羊器械等不可勝數

能元皓為青密等州節度使上元二年六月破史朝義

之將偽驃騎大將軍李元遇等馬步一萬人擒賊將馬  
登封等十人斬首五千餘級

張伯義初隸河東節度使李光弼以戰功累遷試太常  
卿上元中賊帥袁晁亂海浙光弼俾伯義與諸軍討之  
招綏叛亡平蕩山洞功為第一繇是擢授睦州杭州刺  
史

李晟為鳳州節度使高昇列將上元中擊疊州叛羌於  
高當川又擊宕州連狂羌於罕山皆破之累遷左羽林

大將軍同正廣德初節度使孫志直署晟總遊兵擊破  
党羌高玉等賊以功授特進光祿卿轉試太常卿大厯  
初李抱玉鎮鳳翔署晟為右軍都將四年吐蕃圍靈州  
抱玉遣晟將兵五千以擊吐蕃晟辭曰以衆則不足以  
謀則太多乃請將兵千人疾出大震關至臨洮屠定秦  
堡焚其積聚虜堡帥慕容鍾而還吐蕃因解靈州圍而  
去拜開府儀同三司涇原四鎮北庭都知兵馬使累封  
合川郡王為右神策都將德宗即位吐蕃寇劔南時節

度使崔寧在京師三川皆恐晟將神策兵萬五千救援  
晟乃踰漏天攻拔飛越廓清肅寧三城絕大渡河獲首  
虜千餘級虜引去因留成都數月而還建中二年魏博  
田悅反將兵圍臨洺邢州詔以晟為神策先鋒都知兵  
馬使與河東節度馬燧昭義節度李抱真合兵救臨洺  
諸軍皆却晟引兵渡洺水乘冰而濟橫擊悅軍王師復  
振擊悅大破之三年正月復以諸道軍擊敗悅軍於洹  
水遂進攻魏州以功賜實封百戶四年冬德宗幸奉天

詔晟赴難授神策行營節度使實封二百戶自河中繇蒲津而軍渭北壁東渭橋以逼朱泚累加同平章事興元元年五月二十五日夜移軍於光泰門米倉村以薄京城晟臨高指麾令設壕柵以候賊軍俄而賊衆大至晟遣吳誣康英俊史萬頃孟涉等縱兵擊之時華州營在北兵少賊併力攻之晟遣李演孟日華以精卒救之中軍鼓譟演力戰大破之乘勝入光泰門再戰又敗之僵屍蔽地餘衆走白華夜聞慟哭之聲二十八日晟大

集諸將陳兵於光泰門外乃使王佖李演率騎軍史萬頃領步卒直抵苑塙神廳村萬頃先登拔柵而入佖騎軍繼進賊即奔潰大軍分道並入鼓譟雷動賊將姚令言張庭芝李希倩猶力捍官軍晟令唐良臣趙光銑楊萬榮孟日華等步騎齊進賊軍陣成而屢北戰十餘合乘勝驅蹙至於白華忽有賊騎千餘出於官軍之背晟以麾下百餘騎擊之左右呼曰相公來賊聞之驚潰官軍追斬不可勝計朱泚姚令言張庭芝尚有衆萬人相

率遁走晟遣田子奇追之其餘兇黨相率來降京城平  
以功拜司徒兼中書令實封一千戶克鳳翔隴州節度  
使兼隴右涇原節度管內諸軍及四鎮北庭行營兵馬  
副元帥封西平郡王貞元二年十月出師襲吐蕃摧沙  
堡拔之斬其堡使扈屈律悉蒙等

王佖李晟之甥自河西河北出師佖無役不從朱泚之  
亂以河中兵馬使隨晟討賊晟攻賊於光泰門賊鋒尚  
勁佖與兵馬使李演踰苑牆血戰敗賊前鋒諸軍方振



論功為神策將

呂日將為興鳳等州招討使代宗寶應元年日將于興州三嗟谷大破羌賊三千餘衆

嚴武為劔南節度使廣德二年破吐蕃七萬餘衆拔當徇城又拔鹽川城

崔寧本名旰為漢州刺史廣德中吐蕃與諸雜羌戎寇陷西山拓靜諸州詔劔南節度使嚴武收復武急召寧統兵出西山寧尅躬撫士皆願致死命始次賊城周圍

皆石礮攻具無所設唯東南隅環丈之地壤土可穴謀  
知之以告寧寧晝夜穿地道攻之再宿而拔其城因西  
拓地數百里下城砦數四蕃衆相語曰崔旰皆神兵也  
將更前進以糧盡還師武大悅裝七寶輿迎寧入成都  
以誇士衆賞賚過厚

王棲曜為浙東馬軍兵馬使廣德中草賊袁晁亂台州  
連結郡縣積衆二十萬餘盡有淞江之東御史中丞袁  
倓東討奏棲曜與李長榮為將聯日十餘戰生擒袁晁

收復郡邑十六授常州別駕浙西都知兵馬使大曆中  
李靈曜叛於汴州觀察使李涵俾棲曜將兵四千為河  
南掎角以功加銀青光祿大夫建中中李希烈既陷汴  
州乘勝東侵連陷陳留雍丘頓軍寧陵期下宋州節度  
使韓滉命棲曜將強弩數千夜入寧陵希烈不之知晨  
朝弩矢及希烈坐帳希烈驚曰此江淮弩士今入矣遂  
不敢東希烈夜遁後棲曜隨劉玄佐收汴州遷御史大  
夫

白元光為朔方騎將大歷三年九月壬午吐蕃寇靈州  
元光擊破之壬辰元光又破吐蕃二萬衆於靈武獲羊  
馬數千計

伊慎為江西衛將大歷八年節度使路嗣恭討嶺南哥  
舒晃之亂以慎為先鋒直逼賊壘疾戰破之斬首三千  
級繇是復始興之地未幾與諸將追斬泚於泔溪函首  
獻於闕下嗣恭表慎功授連州長史知當州團練副使  
三轉江州別駕討梁宗義之歲慎以江西牙將從李希

烈摧鋒陷敵功又居多尋歸本道明年希烈反嗣曹王  
臯拔慎為大將賊兵沂江來寇慎戰大破其三千餘衆  
累拔蔡山柵取蘄州降其將李良又收黃梅縣殺賊將  
韓霜露斬首千餘級封南充郡王蘄州刺史克節度都  
知兵馬使建中末賊已屠汴州慎以兵擊退賊將杜少  
誠江路遂通又破苟莽柵進兵圍安州賊阻澗水攻之  
不能下李希烈遣其甥劉戒虛將騎兵八千來援慎分  
迎擊戰於應山擒戒虛縛示城下遂開門請罪以功拜

安州刺史兼御史大夫仍賜實封一百戶貞元十五年  
以慎為安黃等州節度管內支度營田觀察使十六年  
吳少誠阻命詔以本道步騎五千兼統荆南湖南江西  
三道兵當其一面於申州城南前後破賊數千以例加  
檢校刑部尚書

李承昭為昭義節度大厯十年田承嗣攻磁州承昭援  
磁州與田承嗣大將盧子期戰於萬泉縣大破之生擒  
子期以獻

馬燧為河陽三城使大厯十一年五月汴州大將李靈  
曜反因絕運路以邀節制代宗務恩大因授靈曜汴宋  
八州節度留後靈曜不受命乃與魏博節度田承嗣通  
謀承嗣遣其子悅將兵與靈曜共破永平軍將劉洽詔  
燧與淮西節度李忠臣合軍討靈曜忠臣懼賊燒廬舍  
西走燧勸其還兵請為前鋒擊破田悅進逼汴州李忠  
臣行汴南燧引軍行汴北又敗靈曜將張清於西梁園  
靈曜又選銳兵八千號為餓狼軍燧獨引軍擊破之進

至浚儀是時河陽兵寇諸軍承嗣又遣悅將兵二萬救靈曜破永平軍將杜如江畧曹州又敗李正己遊軍擊走劉洽長孫全緒等軍乘勝去汴州一舍方陣而進忠臣會宋州淮南浙西兵與戰不利請救於燧燧引軍四千人為奇兵擊破之田悅匹馬遁去靈曜知悅敗明日以百騎夜走汴州悉降後為河東節度建中二年田悅反自將兵三萬圍邢州攻臨洺築重城絕其內外以拒救兵邢州李洪臨洺將張仝皆堅守不拔昭義軍數告急



乃詔燧將救臨洺燧軍出嚀口兵未過險乃遣人持書  
喻悅且示之好悅謂燧畏之十一月師次邯鄲悅遣使  
至斬之以徇遣兵急擊破其支軍射殺其將成炫之悅  
自攻臨洺遣大將楊朝光將兵萬餘於臨洺南雙崗下  
東西列二柵以禦燧燧乃率李抱真李晟進軍營於二  
柵之中其夜東柵走歸悅進軍營明山取其棄柵以置  
輜重謂將吏曰朝光守堅柵不下萬人假令燧等盡銳  
攻之比數日計不能下殺傷必甚吾此必拔臨洺賞勞

軍士而與之戰必勝之術也悅乃分常山李惟岳救兵  
五千以助朝光燧率軍攻朝光田悅將萬餘人救之燧  
令大將李自良李奉國將兵合神策軍據雙崗禦之燧  
乃令推火車以焚其柵自晨至暮急擊大破之拔其柵  
斬朝光及大將盧子昌斬首五千餘級生虜八百餘人  
居五日進軍徑戰燧自將銳兵扼其衝口凡百餘合士  
皆決死悅兵大敗斬首萬餘生虜九百人得穀三十萬  
斛罷甲稱是悅收兵夜走邢州圍亦解尋加魏博招討

使三年正月田悅求救於淄青常山李納遣大將衛俊將兵僅萬人以救悅李惟岳亦遣三千餘人救悅收合散兵二萬餘壁於洹水淄青軍其東常山軍其西首尾相應燧帥諸軍合擊悅軍亂赴水斬首二萬殺賊大將孫晉卿安墨啜生獲三千餘人溺死者不可勝數淄青軍殆盡死者相枕籍三十里悅收兵得千餘人夜走至魏州城將李長春閉門不納久之追兵不至比明乃納既入殺長春嬰城自守數日李再春以博州降悅兄昂

以洺州降王光進以長橋降悅遣大將符璘李瑤將五百騎送淄青兵還鎮因降燧魏城先引御河入城南流燧令塞其領口流絕城中益急恐悅乃遣許士則侯臧徒步間說朱滔王武俊借兵求救時王武俊已殺李惟岳傳首獻於闕下授武俊恒冀觀察都防禦使時武俊同列張孝忠已為節度使武俊獨為防禦使甚怨望且素輕孝忠恥居其下因與悅通謀遂與朱滔約謀救悅悅恃兵且至又出兵二萬背城而陣燧與諸軍擊破之

五月加燧同平章事四年十月德宗幸奉天燧引軍還太原遣行軍司馬王權將兵五千赴行在興元元年七月加燧奉誠軍及晉絳慈隰節度諸軍行營副元帥與渾瑊駱元光同討河中李懷光九月十五日燧帥步騎三萬次於絳分兵收夏縣畧稷山攻龍門降其將馮萬興任象玉燧以兵攻絳州十月拔其外城其夜偽刺史王克同與大將達奚小進棄城走降其衆四千人又遣大將李自良谷秀分兵畧定聞喜夏縣萬泉虞鄉永樂

猗氏六縣降其將辛熒及兵五千人貞元元年軍次寶鼎敗賊騎兵於陶城前鋒將李黯追擊之射殺賊將徐伯文斬首萬餘級獲馬五百匹七月與渾瑊駱元光韓遊環軍次於長春宮懷光將徐庭光以兵六千守宮城燧挺身城下招喻之先一日賊焦離堡守尉珪以兵二千因堡降庭光東道既絕乃率眾出降八月移軍於焦離堡其夜賊太原堡守將吳罔棄堡而遁其下皆降燧率諸軍濟河凡八萬陣於城下是日賊將牛名俊斬懷

光首以城降河中平遷光祿大夫兼侍中

劉玄佐初名洽為永平軍節度衙將大厯中李靈曜據  
汴州反洽將兵乘其無備徑入宋州遂城守詔因以州  
隸永平軍節度使李勉署奏宋州刺史建中二年加御  
史中丞充宋亳穎節度使時李正已死子納匿喪叛居  
無何李洎以徐州從順納怒洎甚遂遣兵圍彭城詔洽  
以諸軍救之洽至與納軍戰大敗之斬首萬餘級繇是  
轉輸之道復通以功加御史大夫洽進收濮州降其將

楊令暉又分兵挾令暉以徇濮陽降其將高彥昭以通  
濮陽津逮兵部尚書復兼曹濮觀察使尋加左僕射淄  
青兗鄆招討使又加汴滑都統副使李希烈攻陷汴州  
德宗居奉天洽與希烈連戰賊勢稍却興元初以功加  
平章事希烈兵圍寧陵洽大將劉昌堅守不下希烈復  
悉兵攻圍陳州洽遣劉昌與諸軍救之大破賊兵獲賊  
將翟宗暉希烈棄大梁走洽率諸軍進攻汴州又以功  
加汴宋節度遷司空無幾加本管及陳州諸軍行營都



統仍賜名玄佐

楊惠元為神策軍京西兵馬使鎮奉天大厯中累有戰功及田悅朱滔反叛召惠元領禁兵三千與諸將討伐戰御河奪三橋皆惠元之功也尋加檢校工部尚書以兵屬李懷光建中末自河朔與懷光同赴國難解奉天之圍

張獻恭為山南西道節度使大厯十二年獻恭上言破吐蕃萬餘衆於岷州

張光晟為代州都督大曆十三年與回紇戰于羊武谷破之回紇引退先是辛雲京守太原回紇懼雲京不敢窺并代知鮑防無武畧乃敢凌逼賴光晟邀戰勝之北人乃安

時鮑防為太原郡守

張獻甫初為偏裨以軍功累授試光祿卿殿中監德宗建中初從節度使賈耽征梁崇義於襄漢以功加試太子詹事及辛奉天興元獻甫首末從渾瑊征討有功及復京邑累加兼御史大夫

楊朝晟為甘泉府果毅建中初從李懷光討劉文喜于涇州斬獲生擒居多授驃騎大將軍稍為右先鋒兵馬使後李納寇徐州從唐朝臣征討常冠軍鋒以功授開府儀同三司檢校太子賓客德宗在奉天李懷光自山東赴難以朝晟為左廂兵馬使將千餘人下咸陽以擊朱泚加御史中丞實封一百五十戶

王武俊為成德軍節度建中初朱滔圍貝州武俊與澤潞節度李抱真合軍於貝丘抱真為方陣武俊用奇兵

朱滔空營合戰武俊不擐甲而馳之滔望風奔潰自蹂踐死者十四五收其輜重器甲馬牛不可勝筭滔夜奔

幽州

尚可孤為神策軍大將建中二年為荆襄應援淮西使以所統之衆赴山南累有戰功及涇原兵叛詔徵可孤軍至藍田賊衆稍盛遂營於七盤山城柵而居之賊將仇敬忠等來寇可孤頻擊破之因收藍田縣元興元年三月遷檢校工部尚書兼御史大夫神策京畿渭南商

州節度使四月仇敬忠復來寇可孤率兵大破焉擒敬  
忠斬之遂進軍與副元帥李晟決策攻討可孤之師為  
先鋒京師平以功加檢校右僕射封馮翊郡王

李希烈為淮西節度建中二年山南東道節度使梁崇  
義拒捍朝命迫脇使臣詔諸節度率兵討之加希烈南  
平郡王兼漢北都知諸道兵馬招撫處置使希烈破崇  
義衆討平之錄功加檢校右僕射同平章事賜實封五  
百戶

李抱真為昭義軍節度建中二年田悅以魏博反乃悉  
兵圍邢州及臨洺臨洺益急詔河東節度使馬燧及神  
策兵救之抱真與燧敗悅兵於雙崗斬悅將楊朝光又  
擊破悅於臨洺燧解臨洺及邢州之圍以功加檢校兵  
部尚書復與燧大破悅于洹水悅以數百騎走歸魏州  
復與燧圍魏州又敗悅于城下以功加檢校右僕射建  
中末李希烈陷大梁李納反鄆州李懷光又竊據河中  
抱真獨於擾攘傾潰之中以山東三州外抗羣賊內輯

軍士羣賊深憚之興元初加平章事時朱滔悉幽薊軍借兵回紇擁衆五萬南向以應朱泚攻圍貝州抱真與鎮州王武俊擊破之于經城以功加檢校司空

王虔休為澤潞兵馬使建中二年節度使李抱真統兵馬與諸將征討河北其雙崗水寨營等陣虔休戰功居多擢為步軍都虞候

劉昌為宣武節度劉玄佐左廂兵馬使建中中李希烈既陷汴州玄佐遣將高翼以精卒五千保援襄邑城陷

翼赴水死自宋及江淮人心震恐時昌以三千人守寧陵希烈率五萬衆陣於城下昌深塹以遏地道凡四十五日不解甲胄躬厲士卒大破希烈希烈退圍陳州刺史李公廉計窮昌從玄佐以浙西兵合三萬人救之至陳州西五十里與賊遇昌晨壓其陣及其未成列大破之生擒其將翟曜希烈退保蔡州自此不復侵軼詔加昌檢校左常侍隨玄佐救汴州又加檢校工部尚書後為四鎮北庭行軍兼涇原節度貞元十四年六月歸化



堡健兒作亂逐出大將張國誠副將張抗詔昌經畧處  
置昌率兵至堡下告語云但選首惡送之餘悉釋而不  
問賊竟不從命乃與昌戰城中大敗誅斬六七百人復  
令國誠入堡

李茂為河陽三城德州節度使以東畿汜水等五縣隸  
馬建中三年河南北聯大兵詔益以神策汝陝之師茂  
進救新鄉共城遂圍衛州明年詔與河東節度馬燧等  
諸軍破田悅於洹水以功加檢校兵部尚書累封郡王

張孝忠為盧龍節度使建中三年正月大破李惟岳于東鹿初朱滔收束鹿據之進圍深州惟岳乃與田悅及其眾一萬圍束鹿滔與孝忠合軍擊之滔命勇敢者數百人蒙猛獸之衣騰奮而前金鼓亂發賊騎奔軼不能制乘亂縱擊大破之惟岳燒營而遁

高固為朔方節度渾瑊麾下建中末德宗幸奉天是時賊兵已突入東壅門固引甲士亂揮長刀連斫數賊拽車塞闔一以當百賊乃退以功封渤海郡王

李元諒為鎮國軍副使領軍潼關建中末德宗居奉天賊泚遣偽將何望之輕騎襲華州刺史董晉棄州走望之遂據城將聚兵以絕東道元諒自潼關將所部仍令義兵因其未設備徑攻望之遂拔華州望之走歸泚元諒乃修城隍器械召募不數日得兵萬餘人軍益振以功加御史中丞賊泚數遣兵來寇輒擊却之是時尚可孤守藍田與元諒為犄角賊東不能逾渭南元諒功居多無幾遷華州刺史兼御史大夫潼關防禦鎮國軍節

度使興元初詔元諒與副元帥李晟進收京邑兵次于  
滄西賊悉衆來攻元諒身先士卒奮擊大敗破之進軍至  
苑東與晟力戰隳苑垣而入賊聯戰皆敗遂復京師加  
檢校尚書右僕射

嚴震為山南西道節度建平末德宗車駕發奉天及入  
駱谷李懷光遣數百騎來襲賴山南兵擊之而退輿駕  
無警急之患尋加震檢校戶部尚書

樊澤為山南東道節度觀察等使建中末頻與李希烈

兗黨接戰前後擒降其梟將張嘉瑤杜文朝梁俊之李克誠薛翼等收唐隨二州貞元二年於襄州東北界泌河口破李希烈賊衆馬步五千人

戴休顏為奉天行營節度使興元初李晟收京師乃與渾瑊韓遊環進軍咸陽破泚斬首三千休顏追賊至中渭橋李晟既清宮闕休顏與瑊等率兵赴岐陽擊泚餘衆及策勳加檢校右僕射封至六百戶

韓遊環為邠寧節度使興元初李晟移軍東渭橋與駱

元光尚可孤分扼京東要路遊環與渾瑊戴休顏分典  
京西要路倚角進攻晟收京師遊環二將亦破賊于咸  
陽論功行封與瑊等

李復為嶺南節度使貞元五年復奏收復瓊州表曰瓊  
州本隸廣府管內乾封中山洞草賊翻叛都督李孝逸  
撫馭失所遂致淪陷已經一百餘年臣羌叛官監察御  
史姜孟京崖州刺史張少遷等悉力攻討累經苦戰方  
克舊城便令降人開葦荆榛建立城柵屯集官軍臣竊

觀瓊州控壓賊洞若移鎮軍在此必永絕姦謀伏望昇  
為下都督府乃加瓊振僭厓萬安五州招討遊奕使額  
請停從之

韋臯為劔南西川節度使貞元九年臯獻獲吐蕃首虜  
器械旗幟牛馬於闕下初將城鹽州德宗命臯出師以  
分吐蕃之兵臯遣大將董勛張芬出西山及南道破峨  
和城通鶴軍吐蕃南道元帥論莽熱率眾來援又破之  
殺傷數千人焚定廉故城凡平柵堡五十餘所十年臯

秦西川峨和城擊破吐蕃三萬餘衆及出兵黎雅等州以援雲南攻破吐蕃柵城斬首三千八百級生虜及降吐蕃二百四十人得其器械牛馬十三年收復雋州

孟元陽為陳許大將貞元中討吳少誠韓全義五樓之敗諸軍多私歸元陽及神策都將蘇光榮宣州都將王幹各率所部留軍激水破賊二千餘人

郝士美為黔中經畧招討使貞元中谿州賊帥向子琪連結夷獠控據山洞衆號七八千士美設奇畧討平之



詔書慰勞封高平郡公元和六年為昭義軍節度使會  
朝廷討王承宗士美兵既合而賊軍大敗下三營環相  
鄉屢以捷聞

高崇文為長武城使憲宗元和元年春以檢校工部尚  
書充左神策行營節度使統左右神策奉天麟遊諸鎮  
兵討劉闢于西川從漢中入遂却劔門之師解梓潼之  
圍賊將邢泚遁歸屯軍梓州因拜崇文東川節度使成  
都北一百五十里有鹿頭山扼兩川之要闢築城以守

之連八柵張犄角之勢以拒王師崇文破賊二萬於鹿頭城下明日又破於萬勝堆堆在鹿頭之東凡八大戰皆大捷李光顏軍於鹿頭西大河之口以斷賊糧道賊大駭賊繇江柵將李文悅以三千人歸順而鹿頭將仇良輔舉城降者衆二萬闢之男方叔子堦蘇強先監良輔軍是日械繫送京師降卒投戈面縛者彌十數里遂長驅而南直指成都德陽等縣城皆鎮以重兵莫不望旗率服師無留行闢大懼以親兵及逆黨盧文若齎重寶西

走吐蕃吐蕃素受其賂且將啟之崇文將高霞寓鄜定  
進倍道追之至羊灌田及馬關自投岷江擒於湧流之中  
西蜀平制授崇文成都尹充劔南西川節度使封南平  
郡王食實封三百戶

高霞寓以長武城軍職元和初授兼御史大夫從高崇  
文將兵擊劉闢連戰皆克下鹿頭城降李文悅仇良輔  
蜀平以功拜彭州刺史尋繼崇文為長武城使封感義

郡王

嚴秦為山南西道節度使元和元年破劉闢賊二千於神泉縣生擒遊奕將牛文悅

劉濟為幽州節度元和初烏桓鮮卑數寇邊濟帥師擊走之深入千餘里虜獲不可勝紀東北晏然五年討鎮州王承宗以大將軍次于瀛州累破樂壽博陸安平等縣前後大殺獲賞功頗厚

李光顏為忠成軍節度元和九年討蔡州下詔光顏以本軍獨當一面光顏於是引兵臨澱水抗洄曲十年五

月破賊於洄曲又與懷汝節度烏重裔同破賊於小澗  
河平其柵十一年連破賊衆拔凌雲柵進檢校左僕射  
十二年四月敗賊衆三萬于郾城其將張伯良奔於蔡  
州殺其賊十二三獲馬千匹器甲三萬尋而郾城守將  
鄧懷金以城降及裴度至行營率賓從于方城淹口觀  
板築五溝賊遽至注弩挺刃勢將及度光顏決戰於前  
以却之賊平加檢校司空十三年東討李師道授光顏  
義成軍節度使數旬之內再敗賊軍濮陽殺賊數千人

十四年西蕃入寇移邠寧節度光顏忻然即路擊賊退之累加平章事鳳翔節度敬宗即位正拜司徒汴州李汭逐其帥詔光顏率陳許之師討之營於尉氏俄而誅汭遷太原尹河東節度使

王沛為陳許行營兵馬使節度使李光顏討蔡州使沛統兵屯於近郊及進軍連破賊徒頻詔促進諸軍觀釁莫敢先過大澗河者沛領卒五千人夜渡合流口扼其喉而成城於是河陽宣武軍太原魏博等諸軍因得濟

合謀犄角而攻圍郾城沛率先部旅築其壘而對焉賊衆危怖其將鄧懷金乃面縛率衆歸降後元濟既擒沛從光顏入覲光顏具陳沛之功勞加兼御史大夫其後救鹽州以功聞拜寧州刺史尋除陳州刺史宣武軍部將李弁亂又詔沛兼節度副使而討焉有功加檢校右散騎常侍遷充海沂密等州節度觀察處置等使

田弘正為魏博節度元和十年朝廷用兵討吳元濟弘正遣子布率兵三千進討屢戰有功十三年王師加兵

於鄆詔弘正與宣武義成武寧橫海等五鎮之師會軍  
齊進十一月弘正自帥全師自楊劉渡河築壘距鄆四  
十里師道遣大將劉悟率重兵以抗弘正結壘相望前  
後合戰魏軍大捷而李愬李光顏三面進攻賊皆挫敗  
其勢將危十四年二月劉悟以河上之衆倒戈入鄆斬  
師道首詣弘正請降淄青十二州平論功加檢校司徒  
同中書門下平章事

弘正子布元和十年統魏之偏師三千會諸軍於唐州



授檢校秘書監兼殿中侍御史前後十八戰破凌雲柵  
下郾城縣布皆有功繇是擢兼御史中丞時裴度為招  
討使嘗觀諸軍城沱口賊有董重質領驍騎突至度甚  
危蹙布領騎二百馳救之俄而諸軍繼至獲免淮西平  
拜左金吾衛將軍

李愬為隨唐鄧節度元和十年用兵討蔡愬嘗獲賊將  
丁士良李祐皆釋縛用為親將又降賊將吳秀琳愬遂  
以秀琳之衆收吳房縣攻其外城十二年十月將襲蔡

州其月七日留遣從事鄭斌使郾城以取元惡之首告  
師期於招撫使裴度且請援焉至期令諸將列大軍東  
行六十里至張柴使李祐盡殺賊衆以義成五百人代  
鎮之愬又分遣諸將斷諸橋道行七十里至蔡城下祐  
與將李忠義先登叱守門者起盡殺之遂帥師而入乃  
令擊柝者曰罷柝者死賊以柝聲如舊不虞我師之來  
至中城如之領軍鞠場號令約束賊方覺悟元濟帥家  
僮以固子城時賊將董重質總數萬人北據洄曲愬曰

彼之有拒我者有望於重質耳乃厚恤其家命其子馳書諭之重質單騎至愬遣都將李進誠率降卒開子城既而焚之門壞而元濟擒焉蔡州平愬以功加檢校尚書左僕射充山東道節度使封梁國公食實封五百戶十三年淄青李師道再叛以愬為武寧軍節度使討之愬破賊金鄉凡十一戰擒賊將五十俘斬萬計淄青平十五年加平章事充昭義軍節度使

烏重裔為河陽三城節度使元和十年王師討淮西三

年重裔與陳許李光顏犄角相應大小百餘戰以至吳元濟誅就加檢校右僕射

韓公武宣武軍節度弘之幼子累授軍職元和十年將宣武兵萬三千人從李光顏討賊淮西平以功擢為鄜坊節度兼御史大夫

史憲誠為魏博軍中右職元和十四年節度使田弘正以全師討李師道令憲誠以先鋒四千人濟河累下其城柵復以大軍齊進乘勝逐北魏博之全師迫于鄆州

城下師道窮蹙劉悟斬其首以投魏軍錄功憲誠超兼  
御史中丞

王智興為武寧軍節度李愬衙將元和十四年王師誅  
李師道智興率徐軍八千會諸道之師進擊與陳許之  
軍大破賊于金鄉拔魚臺俘斬萬計以功遷御史中丞  
賊平授沂州刺史

史奉敬為朔方衙將元和十四年大破吐蕃於鹽州城  
下賜奉敬實封五千戶

薛平為淄青齊登萊五州節度使穆宗長慶元年幽鎮  
叛杜叔良統橫海全軍討伐不勝棗州為賊所窘朝廷  
乃委平以偏師援棗州平即遣將李叔佐以兵五百救  
之居數月刺史王稷餘給稍薄兵士怨怒叔佐不能戰  
宵潰而歸仍推突將馬狼兒為帥行及青城鎮劫鎮將  
李自勸并其衆次于博昌鎮復劫其鎮兵共得七千餘  
人徑取青州城中兵少力所不敵平悉府庫并家財  
厚賞三千精卒逆擊之仍先以騎兵掩其家屬輜重賊

衆惶惑反顧因大敗狼兒與其同惡十數輩脫身竄匿  
餘黨降稍後者猶斬於鞠場其明日狼兒亦就擒戮

劉沔為鹽州刺史天德軍防禦使唐寶歷間在西北邊  
累立奇效太和末河西党項羌叛沔以天德之師屢誅  
其酋渠授振武節度使單于大都護開成中党項雜虜  
大擾河西沔率吐渾契苾沙陀三部落等諸族萬人馬  
三千騎徃至銀夏討襲大破俘獲萬計以功加檢校戶  
部尚書會昌三年迴鶻部饑烏介可汗奉太和公主至

漢南求食過把頭峯犯雲朔北川朝廷移沔為河東節度使加檢校左僕射與幽州張仲武協力招撫竟破虜寇迎公主還宮以功進檢校司空

李載義為幽州節度使文宗太和元年李同捷據滄景要襲父爵載義討之累破賊軍以功加檢校司空三年滄景平策勲加平章事四年四月奚寇邊載義上言今月三日發兵入奚界殺奚賊五千餘人生擒刺史縣令大將首領等二百七十三人五月己卯載義上言先發



兵深入奚部至四月十七日就其帳擒奚帥茹羯以功  
加檢校太保

石雄為振武軍裨將太和中河西党項擾邊雄累立破  
羌之功會昌三年迴鶻烏介可汗奉太和公主牙于雲  
朔北川雄自率勁騎得沙陀李國昌三部落兼契苾拓  
拔雜虜三千騎月暗夜發馬邑徑趨烏介之牙炬火燭  
天鼓譟動地可汗惶駭莫測率騎而奔雄率勁騎追之  
至殺胡山急擊之斬首萬級生擒五千羊馬車帳皆委

之而去遂迎公主還太原以功授豐州刺史克天德防  
禦等使累遷河中晉絳節度使俄而昭義劉從諫卒其  
子稹擅主軍務朝議問罪以雄為潞府西面招撫使以  
晉州刺史李丕為副使王宰在萬善柵劉沔在石會相  
顧未進雄越烏嶺破賊石砦斬獲千計雄既率先破賊  
不旬日王宰收天井關何敬弘王元達亦收磁沼等郡  
稹危感大將郭誼密款請斬稹歸朝武宗詔雄以七千  
兵受降雄即徑馳潞州降誼盡擒其黨與賊平加檢校

司空

張仲武為幽州節度使武宗會昌中迴鶻赤心宰相一族七千帳東逼漁陽仲武乃與弟仲至從弟公素裨將游奉寰王如清率其部下勁兵三萬人大破之收其侯王貴族千餘人降三萬餘人獲牛馬橐駝旃罽幕不可勝計尋遣從事李周曠牙門將國從玘相次獻捷先是奚契丹皆有迴鶻監護使督以歲貢且為漢謀事至是仲武遣裨將石公緒等諭意凡戮八百餘人又迴鶻

初遣宣門將軍等四十七人來偵驅掠雜虜遂逗留其使緩彼師期人馬病死竟不遣之迴鶻烏介可汗既敗不敢近邊乃依康居求活盡徙餘種寄託于黑車子

高駢為神策都虞侯咸通初党項羌叛詔駢率禁兵萬人戍長武城時諸將禦羌無功唯駢伺隙用兵出無不捷懿宗深嘉之先是李琢為安南都護貪於貨賄虐賊夷獠人多怨叛遂結蠻軍合勢攻安南陷之自是累年亟命將帥未能收復五年移駢為安南都護至則糾合

五管之兵暮年之內招懷谿洞誅其首惡一戰而蠻卒遁去收復交州郡邑遷檢校工部尚書天平軍節度使鄭畋為鳳翔節度廣明初黃巢陷京闕僖宗西幸畋受詔許承制便宜行事巢遣尚讓將賊衆十餘萬西追車駕畋率本軍逆戰于龍尾陂敗之因傳檄天下繇是諸侯皆舉義兵以赴京師實畋之功也

王處存為義武軍節度使廣明初黃巢犯闕僖宗幸蜀處存以勤王舉義之功加檢校司空又遣大將張公慶

率勁兵三千合諸軍滅賊巢於泰山以功加檢校司徒  
王重榮為河中節度留後中和元年黃巢將朱溫舟師  
自同州至黃鄴兵自華陰至數萬攻之重榮戒勵士衆  
大敗之獲其兵仗軍聲益振朝廷遂授節旄檢校司空  
俄而忠武監軍楊復光率陳蔡之師萬人與重榮合賊  
將李祥守華州重榮合勢攻之擒祥以徇二年京師平  
以功加檢校太尉同平章事封瑯邪郡王

時溥為武寧軍節度光啓中黃巢攻陳州秦宗權據蔡

州與賊連結徐蔡相近溥出師討之軍鋒甚盛每戰屢捷巢之敗也其將尚讓以數千人降溥溥將林言又斬巢首歸徐州溥功居第一累授檢校太尉中書令封鉅

鹿郡王

安文祐為潞州牙門將光啓中潞州軍校劉廣逐節度使高潯據其城僖宗詔文祐平之既殺劉廣召赴行在授邛州刺史

冊府元龜卷三百五十九

欽定四庫全書

子部

冊府元龜卷三百六十一

詳校官中書臣羅錦森

侍讀臣孫球覆勘

總校官庶吉士臣何思鈞

校對官典簿臣劉景岳

謄錄監生臣沈方大



欽定四庫全書

冊府元龜卷三百六十

宋 王欽若等 撰

將帥部

立功第十三

梁趙犖初仕唐為忠武軍牙校會昌中壺關作亂隨父  
叔文北征收天井關未幾從王師征蠻浹月方克唯忠  
武將士轉戰礮洞之間斬獲甚眾本道錄其勲陟為馬  
步都虞侯乾符中王仙芝起於曹濮大縱其徒侵掠汝

鄭犖率步騎數千襲之賊黨南奔廣明初以犖為陳州  
刺史中和中黃巢東奔先遣驍將孟楷擁徒萬人直入  
項縣犖引兵擊之衆大潰斬獲畧盡生擒孟楷以功累  
加檢校兵部尚書右僕射司空潁川縣伯巢黨知孟楷  
為陳所擒大驚憤悉衆東來先據澠水後與蔡州秦宗  
權合勢以攻宛丘犖因乞師於太祖引大軍與諸軍會  
於陳之西北竟攻巢寨賊衆大潰乃以犖為蔡州節度  
使於時巢黨雖敗宗權益熾六七年間屠膾中原陷二

十餘郡唯陳去蔡百餘里兵少力微日與爭鋒終不能  
屈文德元年蔡州平朝廷議勲累加檢校司徒同平章  
事充忠武軍節度使

準弟昶初為陳州防遏都指揮使黃巢將孟楷擁眾萬  
餘據項城縣昶與兄準領兵擊破之擒楷以歸不數月  
巢黨悉眾攻陳以報孟楷之役又與蔡寇合從兇醜百  
萬棲于陳郊昶開門決戰擒賊將數人斬首千餘級羣  
兇氣沮其後連日交戰無不應機俘斬未嘗小衄以至

重圍數月衆心如一及賊敗圍解朝廷紀勲昶一門之中疊加爵秩當時征鎮之內言忠勇者言守禦者言功勲者言政事者皆以昶昶為首焉昶累加檢校右僕射代鞏為忠武節度使亦以陳州為理所時宗權未滅中原方受其毒陳蔡封疆相接昶每選精銳深入蔡境蔡賊雖衆終不能抗以至宗權敗焉朝廷賞勲加檢校司徒

王敬武唐末為平盧牙將唐廣明元年無埭人弘霸郎

合羣盜於齊埭間節度使安師儒叛敬武率師討平之  
李茂貞本姓宋名文通唐末隸博野軍征伐立戰功繇  
是軍中知名漸為裨校黃巢之寇闕輔也僖宗幸蜀賊  
將王璠尚讓屢肆兇鋒文通以宿衛軍留鳳翔與連帥  
鄭畋大破尚讓于龍尾陂追奔至於奉天賊平輿駕還  
京錄功以文通為神策軍指揮使檢校太保

馮行襲唐末為金州防禦使時興元楊守亮將襲京師  
道出金商行襲逆擊大破之升金州為節鎮以戎昭軍

為額即以行襲為節度使

張歸厚唐末為太祖軍校光啓三年春與秦宗權戰于萬勝大破之大順元年奏加檢校兵部尚書又命統親軍是歲郴王友裕領諸軍屯于濮州之境十一月太祖率親從騎士將合大軍會郴王遷寨未知所往忽逢寇鄆餘寇甚衆太祖亟登道左高阜以觀之命歸厚領所部廳子馬直突之出沒二十餘合賊戰敗將北而救軍雲至歸厚即綴賊苦戰請以數十騎先還時歸厚所乘

馬中流矢而踣乃持槊步鬪漸退賊不敢逼太祖至寨  
亟命張筠劉儒飛騎來迎然謂已歿矣歸厚體被二十  
餘箭尚復拒戰筠等既至賊解乃歸太祖見之撫背泣  
下曰得歸厚身全縱廣喪戎馬何足計乎便令肩舁歸  
汴日降問賚恩旨甚厚尋遷中軍指揮使景福初從太  
祖伐鄆帝軍不利太祖為寇所逼歸厚殿馬翼衛左右  
馳射矢發如雨賊騎千百披靡而退明年與葛從周禦  
晉軍於洹水殊績尤著詔檢校右僕射

張歸弁唐末為軍校乾寧中以偏師佐葛從周禦并軍於洹水光化中又佐張存敬與燕人戰於內黃積前後功表授檢校工部尚書大順初攻討兗鄆命歸弁佐衡王友諒屯單父軍聲甚振尋為齊州指揮使屬青帥王師範叛遣將詐為估人挽車數十乘匿兵器於其中將謀竊發歸弁察而擒之州城以寧明年春青寇大舉來伐州兵既寡民意頗搖有本郡都將康文爽等三人欲謀外應即時擒獲誅之人心遂定歸弁又罄發私帑賞



給士伍青人遂遁青州平超加檢校右僕射遙領愛州  
刺史從征荆襄迴轉檢校左僕射天祐三年春太祖入  
魏誅牙軍魏之郡邑多叛歸弁與諸將等分布攻討封  
境悉平而歸弁於高堂入賊大猛飛矢中于臆太祖嘉  
之命賜銀鞍勒馬一匹金帶一條夏五月命權知晉州  
刺史加檢校司空太祖受禪改滑州長劔指揮使開平  
二年秋九月并軍圍平陽詔歸弁統兵救之軍至解其  
圍加檢校司徒

劉知俊唐末為軍校大順中從太祖討秦宗權及攻徐州皆有功補徐州馬步軍都指揮使攻海州下之遂奏授刺史天復初歷典懷鄭二州從平青州以功奏授同州節度使天祐三年冬以兵五千破岐軍六萬於美原自是連克廊延五州乃加檢校太傅平章事開平二年三月命為潞州行營招討使知俊未至潞州夾寨已陷晉人引軍方攻澤州聞知俊至乃退尋改西路招討使六月大破岐軍於暮谷俘斬千計李茂貞僅以身免

康懷英唐末為太祖軍校光化元年秋從氏叔琮伐襄漢懷英以一軍攻下鄧州三年從征河朔佐張存敬敗燕軍於易水之上天復初年冬太祖率師迎昭宗於鳳翔時李茂貞遣大將符道昭領兵萬餘屯武功以拒太祖太祖命諸軍擊之以懷英為前鋒領衆先登一鼓而大破之虜甲士六十餘人奪馬二千匹翼日太祖方至顧左右曰邑名武功今首盪逆黨真武功也乃詔懷英大加獎激仍以駿馬珍器賜之二年四月符道昭復領

大軍屯於號縣之漠谷太祖遣懷英提騎數千急擊之  
岐軍大敗八月鄜帥李周彝屯軍於三原以援鳳翔太  
祖命懷英討之追至梨園攻下翟州擒其守來獻天祐  
三年冬佐劉知俊破邠鳳之衆五萬於美原收十五餘  
寨乘勝引軍攻下鄜州以功授陝州節度使

朱友恭唐末從太祖四征稍立軍功累遷諸軍都指揮  
使汝州刺史檢校司空光化初淮夷侵鄂渚武昌帥杜  
洪來乞師太祖遣友恭將兵萬餘濟江應援引兵至龍

沙九江而還軍聲大振時淮寇據黃州友恭攻陷其壁  
獲賊將翟章俘斬萬計途經安陸因襲殺刺史武瑜盡  
收其衆以功為潁州刺史加檢校司徒

劉康又唐末從太祖鎮宣武累典親軍襲巢破蔡斬獲  
尤多累以戰功遷元從都將從太祖連年攻討徐兗鄆  
所向多捷

范居實唐末為太祖將從討巢蔡有功又從朱珍收滑  
州改左廂都虞侯預破兗鄆功遷感義都頭鄭州馬軍

指揮使幽州劉仁恭舉衆南下寇魏郡北圍居實與葛從周張存敬率兵救魏大破幽滄之衆於內黃太祖迎昭宗於岐下以居實為河中馬軍都指揮使及昭宗還京賜迎鑿毅勇功臣遙領綿州刺史又遷左龍驤馬軍都指揮使從征淮南迴改登州刺史轉左神勇軍使胡真唐末為太祖元從都將從破巢蔡於陳鄭間尋以奇兵襲取滑州乃署為滑州節度留後

符道昭唐末為太祖元帥府右司馬與李周彝同領寇

彥卿南大豐閭寶已下大軍伐滄州及太祖幸魏州討  
衙中軍前有魏博將山河營指揮使左行遷聞府有變  
引軍還屯歷亭自稱留後從亂者數萬人道昭佐周彝  
與彥卿已下大破之殺四萬餘人擒左行遷斬之有史  
仁遇亦聚徒數萬據高唐又破之擒仁遇以獻乘勝取  
澶博二州平之復殺萬餘人

王處裕唐末自巢寇來降為太祖騎兵前鋒太祖擊巢  
蔡于陳州處裕連拔數寨擒獲萬計巢孽既遁處裕躡

其跡追至萬勝戍賊衆饑乏短兵纔接而潰太祖以其勞表授義州刺史蔡人日縱侵掠陳鄭許亳之郊頻年大戰處裕掩襲攻拒凡百餘陣勦戮生擒不知紀極李唐賓唐末自巢黨與王處裕來歸太祖後與朱珍趣淄州所向摧敵乃取滑平蔡前後破兗鄆淮徐之衆功與朱珍畧等珍之擒石潘也唐賓亦泐淮與郭言掎角下盱眙其後渡河破黎陽李固等鎮攻澶州下內黃敗魏師未嘗不與珍同暨攻蔡之役珍自西南破其外垣



唐賓亦堙塚坎墉摧其東北隅及伐蔡取豐時溥軍於吳康珍亟遇之未能却唐賓引本軍擊敗之珍遂大勝每興師必與珍偕用故往無不利

李思安唐末副王處裕為踏白將渡長淮下天長高郵二邑又推孫儒迫濠州皆有奇績累遷為諸軍都指揮使奏官至檢校左僕射尋拜亳州刺史

胡規唐末為宣武軍都虞侯佐葛從周伐鎮定從張存敬收晉絳皆有功署為河中都虞侯天祐三年佐李周

尋討相州獨當州之一面頗以功聞軍還權知耀州事  
太祖受禪除右羽林統軍尋從劉鄩統兵收潼關擒劉  
知浣獻之乃以為右龍虎統軍兼侍衛指揮使

黃文靖唐末為諸軍指揮使從太祖南平巢蔡北定兗  
鄆皆有功後與康懷英渡淮入壽春之境下安豐霍丘  
至光州而還光化初晉將李嗣昭周德威寇於山東文  
靖佐葛從周統大軍禦之至沙河敗晉軍五千餘騎逐  
之越張公橋乃止後旬日復與晉人戰於邢州之北擒

蕃將賁金鐵慕容滕李存建等百餘人奪馬數千匹尋以功表授檢校右僕射耀州刺史天祐三年春命佐楊師厚深入淮甸越壽春侵廬江軍至大獨山遇淮夷殺五千餘衆振旅而還改蔡州刺史加檢校司空

李重裔唐末為太祖步軍都頭與胡真援河陽逼懷州重裔以部下兵突之射中蕃將安休休又令與李讜騎軍至陝應接郭言迴次澠池破賊帥黃花子之衆改滑州夾馬指揮使蔡賊圍汴重裔以步兵攻下三寨虜獲

甚多太祖大舉伐秦宗權俾重裔以滑兵為先鋒及東討徐州下豐蕭二邑轉右廂步軍指揮使

李謙唐末為左得勝騎軍都將從太祖討蔡賊頗有軍功及東伐兗鄆以所部士伍俘獲甚眾改元從騎表授檢校右僕射

氏叔琮唐末為晉州節度使以禦晉軍時太祖遣朱友寧將兵數萬赴應悉委叔琮節制既至諸將皆欲休軍叔琮曰若然則賊必遁矣遁則何功焉因夜出潛師截

其歸路遇晉軍游騎數百盡殺之遂攻其壘拔之斬獲萬餘衆奪馬三千匹太祖聞之喜謂左右曰殺蕃賊破太原非此老不可叔琮乃長驅收邠州與晉人轉戰直抵并壘軍迴以其功奏檢校司空

張慎思唐末為太祖諸軍都指揮使從平巢蔡充鄆皆著軍功表授檢校工部尚書兼宋州長史

王景仁唐末為宣州節度使劉知俊之叛也從駕至陝始佐揚師厚西入闕兵未交知俊棄馮翊走進尅雍華

降王建張君練頗預戰有功太祖嘉之末帝即位用為淮南西北面行營招討應接使以兵萬人伐壽州至霍邱接戰擒賊將袁叢王彥威王燔等送京師

劉鄩為左龍武統軍充侍衛親軍馬步都指揮使開平三年夏同州劉知俊反引岐人襲據長安分兵扼河潼太祖幸陝命鄩西討即奪潼關擒知俊弟知浣以獻遂引兵收復長安知俊棄郡奔鳳翔太祖以鄩為佑國軍兩使留後尋改佑國軍為永平軍以鄩為節度使檢校

司徒行大安尹金州管内觀察使是時西鄙未寧寇通  
寇境鄴練兵撫衆獨當一面四年加檢校太保同平章  
事

謝彥章為兩京馬軍都軍使貞明中累與晉軍接戰有  
功

寇彥卿為鄧州節度使貞明中淮人圍安陸彥卿奉詔  
領兵解圍大破淮賊而還

賀瓌為北面行營招討使貞明四年與晉人戰於胡柳

晉人敗績臨陣斬晉將周陽五既晡瓌軍亦敗五年春正月晉人城德勝夾河為柵四月瓌率大軍攻其南柵以朦腫戰艦扼其中流晉人斷我朦腫濟軍以援南柵瓌退軍於行臺

後唐李嗣本乾寧中為馬軍都將從李嗣昭討王暉於雲州論功加檢校司空後為雲州防禦使時周德威討劉守光嗣本率代玘諸軍生熟吐渾收山後八軍得納降軍使盧文進武州刺史高行珪以獻幽州平論功授



振武節度使

朱漢賓唐末事梁太祖與諸將破蔡賊有功天復中授右羽林統軍

丁會唐末為宣武軍都押衙自梁祖誅秦宗權併時溥屠朱瑄朱瑾會常以兵從多立奇功授昭義軍節度使同平章事武皇攻潞會以州歸授都招討使加檢校太尉莊宗嗣王位與會決謀破汴軍於夾城

閻寶唐末為梁祖四鎮牙將自梁祖陳師河朔爭霸闕

西寶與葛從周丁會賀德倫李思安各為大將擁兵四出所至立功累遷邢洺節度使天祐十三年以邢州歸于莊宗授檢校太尉同平章事充天平軍節度使東南面招討使十八年張文禮謀叛以寶為招討使進攻之下趙州渡滹水而軍擒文禮所署深州刺史張友順折足送于行臺營於西北隅泊十九年正月契丹大至衆心危懼寶備陳方畧遂挫獯戎加檢校侍中

安金全武皇時為騎將屢從征伐所在立功莊宗之救

潞州及平定河朔凡有戰陣金全皆有功累為刺史  
石君立為招義李嗣昭牙校歷典諸軍天祐中夾城之  
役君立每出挑戰壞汴軍柵壘俘擒而還八年與汴軍  
戰於龍花園敗之獲其大將卜渥以獻王檀之逼晉陽  
也嗣昭遣君立率五百騎自上黨朝發暮至王檀游軍  
扼汾橋君立一戰敗之徑至城下馳突斬擊梁軍敗走  
康思立為河東親騎軍使天祐中從莊宗解圍於上黨  
敗梁人於柏鄉及平薊丘後戰于河上皆有功累遷右

突騎指揮使

毛璋為遼州刺史天祐中從莊宗征河上屢有戰功同  
光元年梁平授華州節度使三年王師討蜀以璋為行  
營右廂馬軍都指揮使克魏王繼岌前驅蜀平璋功居  
多授邠州節度使

夏魯奇為護衛指揮使天祐中從周德威平幽州魯奇  
功居多歷磁州刺史中都之戰汴人大敗魯奇見王彥  
章識之單馬追及擒之以獻梁平授鄭州防禦使

索自通為廳直指揮使天祐中佐周德威攻燕軍於涿州旬日未克自通乃選精騎二十夜薄幽州外郭擒燕將郭在均而還同光中累遷西京留守會楊彥溫據河中作亂自通率師討平之授河中節度使

李紹文本姓張名從楚天祐八年自梁將歸於莊宗賜姓名累加博州刺史預破劉鄩於故元城歷貝隰代二郡刺史領天雄軍馬步副都將又於德勝從閻寶討張文禮為馬步都虞侯明宗收鄆州以紹文為右都押牙

馬步軍都將從破王彥章於中都

張溫為永清都校歷武州刺史山後八軍都將天祐中  
從莊宗襲契丹于幽州收新州歷銀槍效義都指揮使  
同光初北戎陷媯儒擅順平薊六州武州獨全改授蔚  
州刺史

李漢韶為河東牢城指揮使天祐中孟知祥權知太原  
軍府事會契丹侵北鄙表令漢韶帥師進討既而大破  
胡寇以功加檢校右僕射

李存進為天雄軍都指揮使天祐十九年莊宗討張文禮於鎮州定州王處球盡率城中兵甲乘我芻牧無備奄至東垣渡我騎軍已臨賊城不覺其出賊既上橋攻我營門存進惶駭引十餘人鬪於橋上賊退我騎軍已邀賊後前後夾擊之賊退無路圍之數重步兵七千殆無生還者

霍彥威初仕梁為河陽留後乾化未破劉知俊於同州改邠州節度使同光二年從明宗平潞州授徐州節度

使莊宗時契丹犯塞明宗招討北面命彥威為副趙大  
叛於邢州奉詔討平之天成初除鄆州節度使值青州  
王公儼拒命改平盧軍節度擒公儼於膠水盡斬其黨  
累加檢校太尉

孔勅初仕梁為唐鄧節度使貞明中王球據襄州叛勅  
討平之授山南東道節度使

王晏球初仕梁末帝初為龍驤四軍都指揮使時汴州  
捉生都作亂夜縱火焚剽攻建國門末帝登樓拒戰晏



球聞其亂也得龍驤馬五百騎屯於鞠場俄而亂兵以竹竿豎布幕沃油焚建國門勢將危急晏球隔門窺亂卒知無甲冑即出騎擊之亂兵北走屯國門下晏球奮力血戰俄而羣賊散走末帝見騎軍討賊呼曰非吾龍驤之士乎晏球曰臣已敗賊請陛下無憂遲明晏球盡敗亂軍全營族誅以功授單州刺史明宗時為宋州節度使天成二年充北面行營副招討使兵戍蒲城是歲王都謀叛據定州乃以晏球為招討使攻之時都北連

契丹契丹遣奚首領禿餒率虜千騎援都突入定州晏球引軍保曲陽王都禿餒出軍來戰晏球預督勵士卒以待之及賊虜至一戰敗之於嘉山之下追襲至於城門因進軍攻之得其西關城乃高其壁壘營於其間為定州府署令百姓轉輸租稅城既堅峻進攻無利但食其租稅以守之俄而契丹首領惕隱率虜騎五千來援都是時大雨虜至唐河晏球出師逆戰晏球令龍武左右廂指揮使高行周苻彥卿前鋒渡唐河與虜相遇三

戰惕隱大敗追至易州河水暴漲所在陷溺獲虜二千  
騎而還惕隱以餘衆還寨幽州趙德均知其敗也令牙  
將武從諫率勁騎追擊德均分兵扼諸要路旬日之內  
盡獲惕隱已下酋長七百餘人虜勢繇是援絕其年冬  
平賊以功授天平軍節度使

康延孝為招收指揮使領博州刺史同光元年莊宗平  
汴延孝頗有功焉以功累遷保義軍節度使三年討蜀  
以延孝為西南面行營馬步軍先鋒排陣斬斫等使下

鳳州收固鎮降興州敗王行軍於三泉平蜀之功延孝  
居最

王思同為馬軍左廂都指揮使領薊州刺史同光中從  
明帝援糧入幽州逐虜有功遷鄭州防禦使長興中自  
秦州節度使入為右武衛上將軍會董璋據東川叛命  
除西南面行營馬步軍都虞侯伐蜀之役為先鋒指揮  
使至劔門思同以偏眾取小劔門入倒迴收下劔門及  
班師以思同留鎮山南西道

任圜為工部尚書同光中從魏王繼岌伐蜀及班師行及利州康延孝叛以勁兵八千欲迴都西川繼岌署圜為招討副使與都指揮使梁漢顯等率兵攻延孝於漢州擒之以旋至渭南繼岌遇害圜代總全師朝於雒陽明宗嘉其功拜平章事判三司

西方鄴為奉義指揮使天成元年荆渚違命明宗素知其材力擢授夔州刺史克東南西行營招討副使鄴將偏師收復峽內三州二年昇夔州為寧江軍以鄴為節

度使屢奏克捷

藥彥稠為河陽馬步都將領鄧州刺史天成中從王晏球討王都於定州平之遷侍衛步軍都虞侯領壽州節度使會河中指揮使楊彥溫作亂以彥稠為副招討使討平之長興中吐蕃劫回鶻入朝使烏崙紅貢物詔遣方渠屯戍克步騎都部署尋令入吐蕃過靈武道土橋搜索盡獲迴鶻所貢駝馬寶玉藥物因殺為盜蕃部擒首領而還尋授邠州節度使

孫璋為齊州防禦使天成中王都據中山叛以璋為定州行營都虞侯賊平加檢校太保

張虔為護駕親軍都指揮領秦州刺史天成中與諸將圍王都於中山大敗契丹於嘉山之下及平定州以功授滄州節度使

李紹真為北面副招討使同光四年紹真遣人奏收復邢州擒賊帥趙泰等二十一人令負斧鑕徇於鄴城下既而磔於軍門

安審通為齊州防禦使天成中奉詔北征從房知溫營於盧臺會龍脰部下兵亂審通脫身酒筵奪船以濟促騎士介馬及亂兵南行盡戮之以功加檢校太傅充滄州節度使

晉陸思鐸初仕梁為廣武都指揮使歷突陣拱辰軍使積前後戰勲累官至檢校司徒拱辰左廂都指揮使遙領恩州刺史

張朗初仕梁為鄆州都指揮使從招討使段凝襲衛州



下之遂授衛州刺史

李周初仕後唐補萬勝黃頭軍使武皇之平雲州莊宗之戰柏鄉周皆有功遷定霸都指揮使天成三年為邠州節度使會慶州刺史竇琬據城拒命周奉詔討平之梁漢顯太原人少事後唐武皇初為軍中小校善騎射勇於格戰莊宗之破劉仁恭王德明及與梁軍對壘於德勝皆預其戰累功至龍武指揮使

李承約初仕後唐為定霸都指揮使領貝州刺史從莊

宗破夾寨及梁人戰於臨清有功累遷潁州團練使

李德琬初仕後唐為偏校從莊宗戰潞州柏鄉德勝渡  
繼有軍功累加檢校尚書左僕射

安元信初仕後唐為鐵林都校梁將氏叔琮之攻河東  
也別將葛從周自馬嶺入元信伏于榆次挫其前鋒梁  
將李思安之攻上黨也王師將壁高河為梁軍所逼別  
將秦武者尤為難敵元信與鬬斃之繇是梁軍解去城  
壘得立武皇賜所乘馬及細鎧仗遷突陣都將莊宗嗣

晉王位元信從救上黨破夾寨復澤潞以功授檢校司空遼州刺史後為山北管內團練使莊宗降邢臺劉鄩於故元城皆預其功俄遷博州刺史

相里金初仕後唐為小校與梁師戰於柏鄉及胡柳陂以功授黃甲指揮使同光元年統帳前軍拔中都賜忠勇拱衛功臣

張廷蘊初仕後唐為左右羽林都虞侯同光中潞州李繼儔叛廷蘊從明宗為前鋒討之軍至上黨日已暝矣

金史四十五卷  
卷三十六  
廷蘊首率勁兵百餘輩踰洹坎城而上守陴者不能禦  
尋斬關延諸軍入馬軍還改左右羽林都指揮使

李從璋初仕後唐為彭國軍節度使天成二年怛達諸  
部入寇從璋率麾下出討一鼓而破之

張從賓初仕後唐莊宗為爪牙從戰有功明宗天成中  
自捧聖指揮使領鄧州刺史後移左右羽林都校討楊  
彥溫於河中平之

潘環初仕後唐為棣州刺史天成中定州王都叛以為

行營右廂步軍都指揮使賊平改易州刺史開運初契丹入寇王師北征環以金州節度使充北面行營步軍左廂排陣使預破契丹於陽城軍迴授澶州節度使

范延光為宣武軍節度使會魏府屯將張令昭逐其帥劉延皓據其城令延光討而平之遂授鄴都留守

衛審喙初仕後唐為河中都指揮使康福除靈武節奉宣授送赴鎮為一行步軍都指揮使破吐蕃於青崗峽擊李賓於河西有功授郢州刺史檢校司空

李瓊初仕後唐為侍衛牙隊指揮使長興中從高祖討東川至劔州瓊以部下兵破賊軍數千身負重瘡軍還改龍武指揮使清泰中屯雲州累擒獲契丹人馬以功改右奉聖軍指揮使

方秦為奉國都虞侯屯渭州天福初會符彥饒亂秦與馬萬盧順密等擒之使秦縛送至闕尋從杜重威破張從賓於汜水以功除趙州刺史從楊光遠平范延光於鄴移刺萊州

劉處讓為左監門衛上將軍充宣徽南院使天福二年  
范延光據鄴城叛命宣武軍節度楊光遠前靈武節度  
張從賓等討之時處讓奉詔與光遠同叅議軍政從賓  
行次河陽密與延光連結以兵南入雒京東抵成臯將  
犯梁城謀為大逆處讓奉詔自黎陽分兵討襲從賓平  
復又與楊光遠攻鄴四年冬范延光將謀納款尚竊疑  
留處讓親入以禍福諭之乃決歸命以功轉檢校太傅  
郭金海為護聖都虞侯天福二年從王師討范延光於

魏州以功轉本軍都指揮使領黃州刺史是歲安從進謀犯闕以金海為襄州道行營先鋒都指揮與李建崇等同於唐州湖陽遇從進萬餘人金海以一旅之衆突擊大敗之策勲授檢校太保商州刺史

馬全節除安州節度使將赴鎮會金全據安州叛引淮南軍為援因命全節將兵討之殺數千人俘四百餘人送闕俄復鄆鄉以功加檢校太尉授招義軍節度使六年移鎮邢州安重榮之叛也授鎮州行營副招討兼排



陣使與重榮戰於宗城大敗之鎮州平加開府儀同三司克義武軍節度使開運元年授鄴都留守尋加天雄軍節度使北面行營副招討使陽城之戰甚有力焉

王清為奉國軍都虞侯天福六年襄州安從進叛高行周討之踰年不下清請先登諸軍繼後遂拔其城累遷溪州刺史八年詔遣以所部兵屯於鄴九年春契丹南牧圍其城清與張從恩守之少帝飛蠟詔勉諭錫之第宅虜退以干城功繼遷軍額開運二年從杜重威北征

解陽城之圍加檢校司徒

程福贊為軍校天福七年從杜重威討鎮州與安重榮大戰於宗城以功遷洺州團練使檢校太保

皇甫遇為鄧州節度使少帝即位罷歸闕下二年虜南寇從至澶州戰於鄆州北津虜衆大敗溺死者數千人以功拜滑州節度使

漢王周初仕後唐為裨校以戰功累歷都守晉天福初范延光叛於衛州周從杜重威討之以功授貝州節度

使

劉在明初仕後唐為捧聖左廂都指揮使領和州刺史  
從明宗幸汴州至滎陽聞朱守殷叛用為前鋒至汴城  
率先登城賊平授汴州馬步軍都指揮使晉天福初為  
安州刺史會李金全以安州叛在明從李守貞攻之大  
破淮賊以功授安州防禦使明年移絳州楊光遠據青  
州叛召為行營馬步軍都指揮使青州平遷相州留後  
高祖踐阼授幽州道行營都部署時虜守中山在明出

師經畧虜乃棄城而去遂授鎮州留後

杜重威初仕晉典禁軍遥授舒州刺史天福二年張從  
賓搆亂據汜水晉高祖遣重威與侯益率眾破之以功  
授潞州節度使與楊光遠降范延光於鄴城改許州節  
度使累遷侍衛親軍馬步軍都指揮使及鎮州安重榮  
稱兵向闕下重威禦之重威敗重榮於宗城重榮奔據  
常山重威尋拔其城斬重榮首傳於闕下授成德軍節  
度使

李守貞初仕晉為侍衛馬步軍都虞侯領滑州節度使  
開運元年春虜眾犯澶魏少帝幸澶州虜主遣將麻答  
以奇兵由鄆州馬家口濟河立柵於東崖守貞率師自  
澶州馳赴之契丹大敗溺死者數千人晉少帝還京以  
守貞為兗州節度使是歲以守貞為青州行營都部署  
率兵二萬東討楊光遠降之以功加同平章事二年春  
虜王全軍南下前鋒至相州湯陰縣以守貞為北面行  
營都監與招討使杜重威北伐洎獲湯城之捷遂收軍

還累加侍衛都指揮使領鄆州節度使三年夏為北面  
行營都部署軍到長城北二十里與蕃賊千餘騎相遇  
轉鬪行四十里悉驅擁入河斫得首領解里相公首級  
王景崇為右衛大將軍乾祐元年春鳳翔侯益永興趙  
贊以受契丹偽署引蜀軍至南山詔委景崇以西面之  
事景崇至雅趙贊已入朝遂部分雅軍破蜀寇於子午  
谷糾合諸軍再破蜀軍於大散關詔景崇為鳳翔巡檢  
李彥從為左飛龍使領恩州刺史乾祐中趙暉討王景

崇於岐下彥從為兵馬都監破州軍有功賊平授濮州  
刺史

周周密字德峯初仕後唐武皇為軍職莊宗之平常山  
明宗之襲汶陽密皆從征有功

安審暉初仕後唐莊宗從平幽薊戰山東定河南皆預  
其功晉天福五年李金全據安州叛詔馬全節為都署  
領兵討之以審暉為副安陸平移鎮鄧州

馮暉初仕後唐為軍校同光中從明宗征潞州楊立有

功又從魏王繼岌伐蜀蜀平授夔州刺史又從晉高祖討蜀蜀人守劔閣暉領部下兵踰險阻從他道出於劔門之左掩擊殺之守兵殆盡會晉祖班師以暉為澶州刺史

宋彥筠初仕後唐典禁軍同光中伐蜀之役彥筠率所部從康延孝為前鋒蜀平歷維渝州刺史晉初自汝州防禦使從高行周破安從進於襄陽以功拜鄧州節度使



高行周初仕後唐為絳州刺史天成中預平朱守殷於浚下其攻王都於中山與符彥卿為軍馬左右廂都將敗王都擒禿餒首功也累遷天平軍節度使杜重威據鄴叛用行周總兵討之鄴平授鄴都留守太尉封臨清王

李從敏初仕後唐為陝府節度使天成中王都據定州叛命宋州王晏球為招討使率師北伐以從敏為副領滄州節度使王都平移授定州節度

李懷忠初仕後唐為陝府都指揮使天成中康福授靈武節度時蕃部作梗屯于保靜命懷忠援送攻破諸戎道途無滯歷許州滄州都指揮使遙領辰州刺史

趙暉初仕晉為禁軍指揮使天福初從馬全節圍平陸佐杜重威戰宗城皆有功開運末以步兵屯於陝聞漢建義并門乃與部將王晏侯章叶謀戮契丹偽命官屬據有陝州馳騎聞於漢祖乃命暉為陝州節度使乾祐初移鎮鳳翔加同平章事屬王景宗叛據岐山不受代

以暉為西南面行營都部署統兵以討之時李守貞叛於蒲趙思綰據於雍與景崇遞相為援又引蜀軍出自大散關勢不可遏暉領兵數千戰而勝明年拔其城加檢校太師兼侍中

李建崇初仕晉為申州刺史天福七年夏晉祖幸鄴襄州安從進與鎮州安鐵胡合從構逆從進出軍攻南陽時州刺史武廷翰慮賊攻寇繼以湖陽主簿嚴景思覘賊狀告急於朝時建崇步騎千餘北屯葉縣開封尹鄭

王遣兵馬都監宣徽使張從恩皇城使焦繼勳率在京諸軍及葉縣軍拒賊至湖陽縣之花山遇從進軍建宗接戰大破之移授亳州團練使襄陽平遼安州防禦使劉詞初仕晉為奉國第一軍都虞侯天福中從馬全節伐安陸敗淮賊萬餘衆晉祖嘉之授奉國都校賜扈鑾忠孝功臣加檢校司空漢乾祐初李守貞叛於河中充行營都虞侯屯於河西守貞遣敢死士數千夜入其營諸將惶怖唯詞曰小盜耳不足驚也遂免胄橫戈叱短

兵擊之賊衆大敗而退河中平周太祖嘉其功表為華州節度使

王令溫初仕晉為洛州團練使及安重榮稱兵於鎮州晉高祖以令溫為行營馬軍都指揮使與都帥杜重威敗賊於宗城以功授亳州防禦使

王饒初仕晉為奉國軍校屬范延光叛命於鄴張從賓以兵連之朝廷命將討焉饒以偏裨從繇善戰功遷本軍都虞侯累加檢校尚書左僕射復以下常山功加檢

校司空遷本軍都校領連州刺史時安從進叛於襄陽  
晉祖命高行周率兵討之以饒為行營步軍都指揮使  
賊平第功授梁州刺史

安審琦初仕漢為山南東道節度使兼中書令屬荆人  
叛命潛遣舟師數千將屠襄郢審琦禦之而遁朝廷嘉  
之就加守太保進封齊國公

折德辰為府州防禦使廣順二年二月劉崇賊軍三千  
餘人入州境德辰與巡檢使李處稠同部領兵士殺賊

二千收奪衣甲鞍馬萬餘事是月德宸言出兵收下河東界岢嵐軍使張德仁十寨都指揮使蘇審並斬之已遣人於岢嵐軍守禦

曹英為昭武軍節度使侍衛步軍都指揮使廣順二年春總兵討慕容彥超於兗州梯衝漸壘頗有力焉及凱旋授彰信軍節度使總兵如故

史彥超為鄭州防禦使顯德初劉崇之寇潞州也世宗親征以彥超為先鋒都指揮使高平之戰先登陷陣以

功授華州節度使

王漢璋為右龍武將軍顯德五年正月從征淮南收下  
海州詔以漢璋為海州刺史

冊府元龜卷三百六十